

Mimiz Yahdaiq

外婆的秘密

Daj gou geiq ndaej saeh hwnj, yahdaiq cungj dwg nyaengq mbouj dingz, saeg buh, cawj haeux, baet ranz…… Mbouj dingz saek yaep. Aen ranz cungj deng de sousib ndaej cingcingj caezcaez.

Hoeng yahdaiq mboengqneix miz di geizgvaiq, cungj dwg haetcaeux ok dou, banhaemh cij dauqma, mwh ma daengz ranz cungj dwg hanh lae hanh roenx. Daxmeh ngeizvaeg cam de: “Meh, mwngz geij ngoenz neix bae gizlawz ha? Baenzlawz dauqma baenz haemh?” Yahdaiq saeknaj haunyo, saenzcingz gaenjing, gangj vah hix suksuk siemjsiemj: “Mbouj…… mbouj bae gizlawz ne! Couh…… couh youq laj laeuz byaijbyaij. Ae, mbouj miz yungh lo, lai byaij geij gien couh baeg baenz yienghneix.” Daxmeh hix mbouj caiq lai cam, hoeng lij dwg buenq saenq buenq ngeiz.

Miz ngoenz ndeu, yahdaiq dauqdaej deng dou yawjraen lo. Ngoenzde, gou dwgliengz lo, daxmeh daiq gou bae segih weiswnghsoj yawj bingh. Ngamq haeuj dou, gou couh yawjraen boux vunz gou sug he—byoem raizhau, daenj buhguhong caezcingj, daemqdaemq bizbiz, de mbouj couh dwg

yahdaiq gou ha. Cij raen de gungj ndang roengz, sugsed baet dieg, seiz mbouj seiz aeu fwngz uet hanh gwnz naj.

Gou yawj coh daxmeh, ragrag genbuh de, vix coh yahdaiq naeuz: “Meh, de mbouj dwg……” Daxmeh danq gaemz heiq ndeu, bibi gyaеuj, cix gijmaz cungj mbouj gangj.

Ma daengz ranz le, yahdaiq lumj lwgnyez guh loek saeh nei, ngaem gyaеuj roengz. Daxmeh nyaеuqnyaеuq bwnda, haemqnanz cij hai bak: “Meh, mwngz neix gaenq mbouj dwg baez daih’it lo. Baez gonq mwngz laeglemx ra faenh hong ndeu, deng gou swz lo, mwngz baenzlawz youh ra faenh hong moq ne? Mwngz youq ranz ndeindei yietnaiq, dou youq baihrog ndeindei guhhong, mbouj ceng faenh hongcienz mwngz neix. Mwngz seizneix ndangdaej lij cangq, ngoenz lawz saeklaеuq ndangdaej mbouj ndei lo, di cienzhong neix cungj mbouj gaeuq yw bingh mwngz!” “Ai, gou yawj sou ngoenz—naengz guhhong baenzneix sinhoj, gou boux geq neix hix bang mbouj ndaej gijmaz, couh siengj bang sou faendan di……” “Meh, gou rox mwngz saedceij hoj



gvaq gvenq lo, geq le hix dingz mbouj youq. Danghnaeuz mwngz caensim sim’ in dou, couh swz faenh hong neix bae ba……”

Lwgnyez lumjbaenz mboujlwnh maj geijlai hung, youq ndaw da bohmei cungj dwg lwgnyez maj caengz hung, dwg cuengq mbouj roengz gij gvaqniemh bohmei. Yahdaiq nyinhnaeuz guh hongranz dwg gij cwzyin de, okbae guhhong ndaej gemjmbaeu rapdawz daxmeh, gangj daengzdaej, cungj dwg aenvih gyaеz dou.

(Gyanghsuh Swngj Suhcouh Si Suhcouh Gunghyezyenz Daihngaih Sizyen Siujoyz roek nienzgaep Se Swjsinh)



Go’nywj

小学

Seizcin daеuj lo, dahsau seizcin riuj cwz va ndeu daеujdaengz henz go’nywj, gizdieg de lumh gvaq haenx cungj bienq heu lo. Go’nywj couh youq ndaw rumzcin majhung, maj ok mbaw moq heuyayau.

Dahsau seizcin ngamq byaij bae, daeggo seizzah yiedcingz haenx couh daеuj lo. De baez daеuj, daihdeih couh deng cit ndaej ndatfwdfwd, go’nywj cungj deng cit roz lo. Mwhde, raq fwn hung ndeu daj gwnzmbwn doek roengzdaеuj, go’nywj gwn raemx imq le, maj ndaej engq heu lo, vih seizzah dem hwnj caengz heuloeg he.

Seizzah daeggo ngamq byaij bae, seizcou daxmeh couh riengz rumzcou mbin daеuj lo. Go’nywj bienqbaenz saek henjgim lo, mak gwnz faex cug lo, doenghduz yaek gvaq seizdoeng haenx cungj daеuj mbaet mak bae bwh gwn lo!

Daxmeh seizcou ngamq yaek caеuq raeuz doxbiek, daxgoeng seizdoeng riengz raq rumznit ndeu sawqmwh daеujdaengz lo. Gwnzmbwn nae lumj fwjhau nei mbin roengzdaеuj, lumj faiq nei hoemq youq gwnz go’nywj, dinghdingh caj seizcin bimoq. Mwh seizcin bimoq daеujdaengz, go’nywj youh daj ndaw namh ndonj aen gyaеuj okdaеuj lo. Neix caen lumj canghsei Bwz Gihyi Dangzcauz naeuz nei: “Feizdoengh coemh mbouj dai, rumzcin ci caiq maj” ha!

(sam nienzgaep Cangh Simhningz)

Suenangq Gou

我的乐园

Danghnaeuz mwngz cam gou, suenangq gou youq gizlawz, gou itdingh naeuz: “Suenangq gou couh dwg ranz—mbanj gou!”

Seizcin, ndaw dah lae dingdung lumj baenz aen baenz aen yaemfouz cingq-caih diuqdoengh. Dahsau seizcin lumh aen gyaеuj gou, heuh gou naengh roengzdaеuj dingq singgo diuzdah iq; dahsau seizcin lumh dwk daihdeih caеuq gofaex, bang gyoengqde daenj mauh heuoiq. De lij daiq daеuj haujlai baengz—youx: Roegenq, mbungqmbaj, duzdouq caеuq roeggacak daengj, dou youq ndaw ndit daxgoeng daengngoenz dak—ndit raeujrub.

Seizzah, duzbid youq gwnz faex angqyangz ciengq dwk go, faexhung youq

henz bekwngz goksasa. Mbouj rox mbouj nyinh, daihdeih bu hwnj caengz deihdamj saekheu ndeu, lumj cingq angqcoux daeggo seizzah daеujdaengz nei. Daeggo seizzah vihliux hawj dou geij hozhawq, caenfwnz ndaem le haujlai gvehoengz, mbouj geij nanz, gvehoengz ndaej gwn lo, gvehoengz aenaen hung lumj aen cuzgiuz nei. Daeggo seizzah dawz doenghgij gvehoengz neix soengq hawj daihgya. Daihgya gwn gvehoengz mbouj dingz haenh daeggo seizzah, daeggo seizzah ndawsim angqvauvau.

Seizcou, mehsimj seizcou bang gofaex rieg hwnj buhhenj, daihdeih youh bu hwnj caengz deihdamj saekhenj he, angqcoux daxgoeng seizdoeng daеuj—daengz. Doengzseiz mehsimj seizcou lij daiq daеuj haujlai laex, lwgndae, makcauj, makgam, haeux…… Gou ceiq maij daj gwnz “deihdamj” gip aeu mbawfaex ceiq nding daеuj ngoenzyawj. Neix caen dwg mbaw doz gingjsaek gyaеundeih he ha!

Seizdoeng, daxgoeng seizdoeng hozswnh cungj hawj diegnywj, doenghnaz, gofaex hoemq hwnj caengz denznae nanwt he. Mwhde dwg aen geiqciет dou ceiq maij ndeu lo, dou mbouj goq rumznae bae dieg nae guhcaemz. Miz mbangj doi vunznae, miz mbangj hoenxcienq nae, lij miz mbangj ringx giuznae. Daihgya guhcaemz ndaej angq raixcaix.

Ranzmbanj gou, mboujlwnh geiqciет lawz, cungj dwg hawj gou sienggyaеz. Gou gyaеz suenangq neix.

(haj nienzgaep Hanz Yinlinz)

